

**0,25 literi tikillugu imaqarsinnaasumut imeruusaatit puuinut akitsuut (Akitsuutit normuat 034) aammalu 0,25 literi sinnerlugu imaqarsinnaasumut imersuusaatit puuinut akitsuut (Akitsuutit normuat 035), §1 imm.1, nr.6-mi litra a aamma litra b allassimasut peerneqarsinnaaqullugit Inatsisartut Inatsisaannut nr.17 22. November 2011-meersumut allannguutissatut siunnersuummik saqqummiussinissamut Naalakkersuisut peqquneqarnissaat pillugu Inatsisartunut aalajangiiffigisassatut siunnersuut**

*Inatsisartunut ilaasortaq Jens-Frederik Nielsen, Demokraatit*

## **pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

## **ISUMALIUTISSIISSUTAA**

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq

Inatsisartunut ilaasortaq Jens Frederik Nielsen, Demokraatit, siulittaasup tullia

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Mariia Simonsen, Inuit Ataqatigiit

Inatsisartunut ilaasortaq Kuno Fencker, Siumut

Inatsisartunut ilaasortaq Karl Tobiassen, Siumut

Inatsisartunut ilaasortaq Jens Napaattooq, Naleraq, Knud Mathiassen, Attaviitsumut sinniisussaq

UKA 2023-mi ulloq 18. oktober 2023 siullermeerinninnerup kingorna ataatsimiititaliap sunnersuut misissorpaa.

### **1. Siunnersuutip imarisaa siunertaalu**

Imeruusaatit puunik 034-nik aamma 035-nik eqqussuinermi akitsuutit peerneqarnissaat siunertaralugu Inatsisartut inatsisaannut nr. 17, 27. november 2011-meersumut allannguutissatut siunnersuummik saqqummiusseqqullugit Naalakkersuisut peqquneqarnissaat siunnersuuteqartup siunnersuutikkut matumuuna kissaatigaa. Imeruusaatit immiaaqqallu puui pillugit nalunaarutip nutaap kiisalu Nuuk Imiup matuneqarnerata kingunerisaannik akitsuutip tunngavissaarunnera siunnersuuteqartup siunnersuumminut tunngavilersuutigaa. Tamatumun-

nga pissutaavoq nioqqutissanik, puiaasanik utertitsisarnermik aqqissuussinermut ilaasunik, atuinissamut aningaasatigut kajumilersitsinissaq siunertaralugu akitsuutip taamani atuutsin-neqalersimanera, taannalu 1. januar 2024-mi aqqissuussinermik nutaamik taarserne-qartussaavoq.

## **2. Siunnersuutip Inatsisartunit siullermeerneqarnera**

Siunnersuut siullermeerneqarami taparserneqarlunilu akerlerineqarpoq. Aningaasalersuutissatut periarfissat allat misissorneqartariaqarnerat nalinginnaasumik kissaatigineqarpoq, taamaatumillu siunnersuut Aningaasaqarnermut Akileraartarnermullu Ataatsimiititaliamit suliarine-qartussanngorlugu innersuunneqarpoq.

## **3. Siunersiuineq**

Ataatsimiititaliap siunnersuummik suliarinninnerani atugassatut kisitsisitigut paasissutissat Aningaasaqarnermut Akileraartarnermullu Naalakkersuisumut ataatsimiititaliamit ujjartorneqarput. Ataatsimiititaliap allagaa aammalu Aningaasaqarnermut Akileraartarnermullu Naalakkersuisup akissutaa isumaliutissiissummut matumunnga ilanngussatut ilanngunneqarput.

## **4. Ataatsimiititaliap siunnersuummik suliarinninnera**

Siullermeerinninnermi oqariartuutit tunngavigalugit ataatsimiititaliamit paasineqarpoq akitsuutit innuttaasunut inuiaqatigiinnillu iluaqutaasumik appartinneqarnissaat akuersaarnartutut isigineqartoq. Taamaattumillu innuttaasut pisissutigisinnaasaannik annertusaanissap siunnersuummut matumunnga tunngavilersuutigineqarnera paasilluarneqarpoq.

Siullermeerinninnermi oqariartuutigineqartut tunngavigalugit ataatsimiititaliamit aamma paasineqarpoq siunnersuummut aningaasalersuutissatut siunnersuuteqartup siunnersuutaa akuersaarnartinneqanngitsaq.

Tamatuma saniatigut siunnersuutip toqqaannartumik toqqaannanngitsumillu sunniutigisinnaasaasa paasinarsinneqarnissaat kissaatigineqarpoq. Ataatsimut isigalugu siunnersuutip inuiaqatigiinnut, inuussutissarsiortunut kiisalu innuttaasunut kingunerisinnaasaasa annertunerusumik misissorneqarnissaat kissaatigineqarpoq.

Kiisalu suliamut aamma tunngatillugu oqaatigineqarpoq akitsuutip piivinnissaa aqqutissatut isigineqanngitsaq, kingunerisinnaasaali erseqqinnerusumik misissuiffigeqqissaarneqartariaqartut. Tamanna ataatsimiititaliamit ima paasineqarpoq; taamatut erseqqinnerusumik misissueqqissaarnermi akitsuutip ilaannakortumik appartinneqarsinnaaneranut periarfissat aamma isiginiarneqassatut. Tassungali atatillugu kisitsisinik erseqqinnerusumik taasaqartoqanngilaq.

Taamatut erseqqinnerusumik misissueqqissaarnissaq siunnersuummik tapersiinninnermi pisariaqartoq piumasagaatitut isigineqassappat misissueqqissaarnerup taamaattup, ukiakkut maanna ataatsimiinnerup ingerlanerani imaluunniit maanna katersuunnermi ataatsimiititaliap

isumaliutissiissummik tunniussivissatut piffissaliusseq sioqqullugu, naammassineqarsinnaannginnera ataatsimiititaliamit naatsorsuutigineqartariaqarpoq.

Taamatuttaaq siunnersuutip piviusunngortinneqarnissaanut aningaasalersuutaasinnaasunik allanik misissuineq ukiakkut ataatsimiinnerup ingerlanera qaangerlugu aatsaat pisinnaasoq ataatsimiititaliamit naatsorsuutigineqartariaqarpoq.

### 5. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut. Ataatsimiititaliaq tamatumunnga annertunerusumik oqaaseqaatissaqanngilaq

### 6. Ataatsimiititaliap inassuteqaatai

Siunnersuut **itigartinneqassasoq** **ataatsimiititaliami amerlanerussuteqartut** Inuit Ataqtigiit Siumullu inassutigaat.

Siunnersuut **akuerineqassasoq** **ataatsimiititaliami ikinnerussuteqartup** Demokraatineersup inassutigaa.

**”Ataatsimiititaliami ikinnerussuteqartoq** Demokraatineersoq ikinnerussuteqarluni ima oqaaseqaateqarumavoq:

*“2019-mi akitsuutit assigiinngitsut pillugit innuttaasut akerliussutsitsisumik takutitsinerat tamatta eqqaamagunarpagut. Ingammik sukkunut akitsuut kamammik kinguneqartitsisimavoq. Akerliussutsitsisumik takutitsisoqarnerani politikerit Inuit Ataqtigiinneersut nuimalluartut arlallit peqataapput, ilaatigut maannakkut Naalakkersuisunut ilaasortaasut.*

*Maanna Inuit Ataqtigiit sivitsortumi pissaaneq tigummisimalerpaat. Akitsuutit akerliussutsitsisumik takutitsisoqarnerani eqqaaneqarsimasut ataasiinnarluunniit peerneqarsimanngilaq. Tamanna arlalissuit pakatsissutigeqqagunarpaat.*

*Piviusormi unaavoq qinigaaffik una neqinut akitsuutit kisimik appaavigineqarsimapput, tamannalu Naalakkersuisut siunnersuusiorderasigut pinngilaq, kisiannili Demokraatit siunnersuusiorderatigut.*

*Demokraatiniillu suli innuttaasut pisisinnaassusaanik annertusaaniarutta akitsuutinik pii-aanissaq pisariaqartinneqartoq isumaqarpugut. Siunnersuut una ulluinnarni innuttaasut amerlanerpaat pisiarisartagaanniit nioqqutissat puusa akitsuutaat peerneqarnissaa pineqarpoq. Siunnersuummi matumani akuersineq, juice aammalu saftit pisisartumut akikinnerulernissaanik, taamatuttaarlu pisisinnaassusermik annertusaanermik, kinguneqassaaq.*

*Ajoraluartumik takulerparput nioqqutissat akikinnerulernissaat amerlanerussuteqartunit akuerineqalinngitsoq. Amerlanerussuteqartut suli innuttaasut kaasarfianniit aallerniarput. Tamanna Demokraatit tungaanniit tapersersinnaanngilarput. Ajuusaarnartutut isigaara kisiartaalluta innuttaasut pisisinnaassusaanik annertusaaniaratta.*

*Tamanna tunngavigalugu siunnersuutip akuerineqarnissaa inassutigaarput.”*

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Asii Chemnitz Narup  
Siulittaasoq

---

Jens Frederik Nielsen  
Siulittaasup tullia

---

Karl Tobiassen

---

Mariia Simonsen

---

Kuno Fencker

---

Peter Olsen

---

Jens Napaattoq